



讀史亭詩集卷十五

南陽彭而述禹峰甫

五言絕句

紫金山

畧記曩時路跨驢來此山白頭老道士采藥不曾還
曾聞賈學士讀書此洞中豐碑不可見暮鳥但呼風
廿載曾遊此山門晚照孤黃冠何處客猶此種葫蘆
雙鶴巢飛觀山雞叫墓田羽人空世外金碧是何年

獻廷庄

雞豚散平原禾熟田家釀晚照入羣峰山色全無恙
金丸彈野雀飛鶻搏狡兔天上下將軍湖南傳露布

風急丹江岸葉下禹山麓白雲擁車輪尚有老蝙蝠
別山辭

江北燕子來江南春草發錦纜萬里行送君入西粵
紫金花正開二月天氣熱楚山多鷓鴣莫認是百舌
陌上麥青青別酒與君酌近日湖湘南解烹紅羊酪
有客去南方扁舟入漢沔欲寄長沙書中宵幾輾轉

肅州曲

玉帳臨河魁將軍出天上勒馬崑山西蔥嶺平如掌
我讀西域志南詔接土蕃 今皇好遠畧莫閉玉門關
都護入河西大旗閃隴右部奏龜茲樂云是漢甥舅
秦皇城下骨傳是戍邊卒黃沙迷歲月鐵鏃痕未沒

隴山嬌鸚鵡花門走駱駝神禹真多智中原無黑河
蕭蕭黃葉下萬里羅征塵離觴好共把酒泉不醉人
翠蕤出大漠飽食黃羊肉至今燕支山猶聞婦女哭
莫笑趙充國欲屯塞下田今日屯田使次第到絕邊
騎馬臨甌脫試問受降城古來何南地歲久無人耕
邊襍回紇種毛毳作氊屋枸杞赭如丹爲我寄十斛

錦泉亭

孤塔雨呼鳩層城風急隼杏花飛雪片况有春蝶引
兩年不到此今攜客手登關西都護淚日暮下三升
將軍手植栢半膏健兒斧斜日孤亭上腥風下童殺
野鴿掠僧舍紅陽漲墓田頽隍一片石云是漢家泉

小飲廢寺

荒堦留短碣幢影散諸龕
雒陽秋草後誰與記名藍
栢屑磨成香榆錢煮作飯
門外無人聲梁上空巢燕
老去頭空白十年罷一官
初衣問佛祖好上雨花壇
武當斜日裏倚帝北城來
山色全無改芙蓉萬古開
巖有太古雲寺無十年樹
牧馬荆榛中煙寒樵唱路
萊公祠上酒范老花間雀
西夏與澶淵丹青照寂寞
麥花蕩薄暮竈土入新田
瓦礫千家哭殘魂戰壘邊
外郭築金帥建成襄樊城
李綱若見用此處是神京

滇中曲

庚子七月

送爾芝岡去金商動早秋
關山人萬里馬首鷓鴣愁

武昌城外柳並轡過南陞
蘭且梧梢月那堪更別離
湘流無限恨展轉四年中
何當西海上羅袂泣秋風
無柰巴陵去昆彌別舊遊
征人腸斷處落月滿西樓
老淚癡難下消魂送爾歸
衡陽還有雁莫遣信書稀
關嶺躑躅過鐵橋仔細行
重陽風雨近屈指計歸程
辛丑中秋胡德輝白堂小集

碁聲敲落木酒氣入殘霞
分付今宵月浮雲且莫遮
五嶺寒初到九疑青欲來
宦游何處客同上粵王臺

桂林新月

嶺外纖纖月半規帶晚霞
今宵歸夢裏踏月過長沙
畫角荒城暮天邊早掛弓
遙知西海上兵氣銷崆峒

客心倦遠遊月態乘新霽愁人關塞老妾夢香闈殢
故鄉十載別嶺月莫相訕團團自有時試問北來雁

離江晚照

落日吼楓林殘霞亂瑰瑋城闌暮鼓鳴估楫猶啣尾
蠻風冬日勁亂石江流緊短景駐斜暉赤城吐碧筍
落日離江上芙蓉映水紅征帆南北客鄉心羈旅中
喬土日光瘦崦嵫對海涯離愁天一角十月見梅花

七言絕句上

乙酉春寓池携兒輩登古芝墩是日清明望北里

遙拜愴賦二首

堤柳搖風陂麥斜平天高塔隱朱霞春思踰籍入秋浦

不見昔人空杏花

綠波曲曲繡城隈寒日驚心風雨來艸沒芝墩篝火夜
水車嶺上白猿哀

池陽

秋浦緋桃古院飛三年遊子未能歸鄉愁緝結終天恨
望斷江南慈姥磯

去年

去年迎母拜茲村芳草郵亭護短垣誰道板輿成旅襯
枯楊十里餞歸魂

憶舊

春花春草憶仙臺淚洒征衫樹底梅斜日秣陵桃葉渡

北鴻莫帶晉雲來
鞀鼓聲喧野火飛
綺羅無計出重圍
春山峽底鴝鷓夜
憶爾踉蹌歸未歸
底事塵飛萬慮慵
芳幃戍削舊芙蓉
汾陽橋上楊家妓
惱殺春風妬殺儂

九江中秋

潯陽渡口水潺湲
少府金錢此抱關
霜飽蟹螯持對酒
娟娟江月醉廬山

五年故里失中秋
湓浦今宵覓酒樓
城郭兵殘灰劫後
琵琶無淚濕江州

東南烈焰左家軍
粉堞灰殘淡夕曛
莫向靈光侈魯殿

武安祠宇未全焚

馬公洲

三月楊花處處飛
平田麥浪溼征衣
郢城舊是山陵路

可有熊羆守翠微

興都陵衛在
今安陸府

中湘曲

戊子九月十日楚
國重陽已三度矣

驚魂舊夢憶黔州
消息難傳漢水頭
前日長兒舟北發

此時應過岳陽樓

家口尚僑
寓漢陽

王渠湖北響鳴笳
陳賀湖南亂似麻
乍喜徐君來寄語

前軍今已到長沙

王有弟第
亂襄樊

南來計曳武昌船
湘上逢秋又一年
因對茱萸思故里
茱萸河在鄧西偏

漢口曲

六年三月初九
日罷官歸里

葦墻茅屋自成村
岸拍桃花江水渾
自笑五年江上客
從茲免得賦王孫

長沙曲

丁亥秋戊子巳丑及此
番奉 徵凡四至長沙

雨聲木葉古潭州
景物蕭疎動客愁
三載南遊四過此
緣慳未上望湘樓

傷情無柰是長沙
故老空傳十萬家
怪鳥聲喧蒼鼠夜
忽聞幕府動琵琶

文牕綺閣鎖明璫
鐵騎風吹下水航
倚徙粧臺思曉鏡
梅花依舊老東墻

繡幃錦幕帶朱顏
萬斛離愁未許刪
夢裏黃州今夜月

飄零秋色一凭欄

榮王舊邸

鴛鴦瓦碎雉朝飛
無復呆愚舊舞衣
爭向臨春臺上望
黃柑歷歷雨初肥

池塘寂寞石臺孤
日暮西風起鷓鴣
不柰管絃人去盡
叢篁客淚憶金鋪

鐵騎風鳴動鼓鞶
後庭老樹散烏棲
傷心莫話前朝事
十萬樓船過粵西

荔枝老去杜鵑紅
遮莫年光入舊宮
淮南山子梁園雪
一樣回波解向東

碧溪巧傍石床開
翡翠樓頭鸚鵡杯
金鎖消沉銀燭冷

薜牆螢火夜飛來

牂牁東下水泔泔桂樹婆娑霧雨昏金雀銷殘羅綺盡
獨憐獅子倚宮門

雜詩

時赴定南徵至長沙未果行歸
抵武陵作已丑十一月十五日

南國紅粧北紫駝胭脂取次渡滹沱琵琶空憶漢宮月
近日黃沙青塚多

漢上口號

漢水三百六十灣襄陽東至大別山堤下垂楊連屋綠
二月行人馬上看

三月南征二月歸隔年兩見杏花飛沙陽燕子莫相笑
今春客似去春衣

九龍贈寒濤

天門南下卽層城况是新秋秋月明鄉夢欲成難伏枕
空山夜半老龍聲

樹王

霜皮百丈矯青霓枝葉扶疎星漢低再過千年不可料
安知不與祝融齊

九龍盆

暗泉深樹碧琅玕杖履峻嶒醉石壇兩次不登方廣路
逢人羞說九龍灘

別破門

菜畦茶竈與繩床半百癡僧鬢有霜錯怪谿山橋上月

不能送汝過衡陽
南山萬古老雲屯
纔下天門即破門
秋夜不聞谿水靜
陰崖石礪伴黃昏

明朝勒馬去衡州
北望山雲木葉稠
下火場中門早閉
松邊石縫海棠秋

衡岳路

秋深秔稻馬頭香
竹裏雞聲度短墻
師古橋邊南岳路
重來誰識舊彭郎

祝融萬丈卷晴霞
霹靂泉聲盪日車
若使銀河通此去
從渠一借斗邊查

郢上

漢陽城北鐵門關
飽酌碑渠醉白鷗
好借黃頭為寄語
五年十看鳳凰山

建利道

平湖彌望草如煙
人在蘆中來刺船
五尺沙棠輕似葉
消沉風月是長年

四過岳州懷舊

唐寅

把酒行觴意未休
淑元昔在岳陽樓
無情此日君山廟
不遣行人到上頭
匹馬磯頭布穀聲
巴陵有酒舊知名
欲邀昌老同今醉
可惜岳陽樓未成

自粵歸二月晤丁二字師開元寺

虛堂簾影茗煙微屋角蒼松大十圍試問繩床風雨夜
幾番龍攫老僧衣

聊園

踏遍三湘又五谿今年纔到鄧城西鄰墻老友深相念
牀底鴟夸手自攜
空園濁酒對山樵極目荒城木正凋却憶桂林前歲月
雪花今已綻梅條

同馬雲孫西城

殘郭春田燕麥肥隔墻二月碧桃飛山僧薄暮不成醉
但看棲鳥將子歸
百里頻煩下澤車深春薄雪一燈初等閒記得南塘路

楊柳青青夾短蔬

柳絲孃孃夕陽低酒後歌聲憶大堤萬里蒼梧催短鬢
多情今到紫金西

送侄來太以忠以義歸江右

孤筇從未到匡廬赤岬潮頭識面初十載故人頻念汝
恐妨五老問來書

彭蠡原是我家湖萬頃玻璃入畫圖此去翻君應有問
春陵王氣舊南都

吳頭楚尾去來賒醜酒東郊散曉鴉舟去潯陽莫繫纜
夜來恐有舊琵琶

清涼寺書似納川

清涼寺書似納川

十里孤峰古渡頭，崢嶸遙見舊鐘樓。
山花滿院經堂寂，新雨長林喚一鳩。
短牆賸有玉簪花，愛客花前霍六茶。
廿載兵戎說不盡，老僧指點舊袈裟。

隨西道

馬上羅披漲水渾，蓮花初湧一峰尊。
南天門外留雙樹，歸雀斜陽帶雨痕。

百折千迴止此河，玉虹何事戀青螺。
纔歸江漢即東海，不及故山知已多。

官潭未已即安居，河伯不勞遮使車。
南去蒼梧將繫馬，遣君先報_{延書}庭書。

隨處得名亦偶然，不應占盡楚山川。
黃河近日聞東徙，白馬空傳漢武年。

漢上曲

魯山脚下數歸鴻，萬里長江瞥轉篷。
漢口商人廣陵曲，隨風捲入大江東。

五年慣食武昌魚，南國諸生立雪初。
一自扶風冷絳帳，康成東去意何如。

漢口夜半起笙竽，畫鼓樓船手擣菹。
二八女郎爭送客，趁風好過洞庭湖。

漢陽城外喧鼓鼙，平明直至日脚西。
隔江驛館人不睡，漏下初更雞已啼。

哭孟津

壬辰三月二十日
五首

三月春風到洛陽
飛花如雪滿垂楊
嵩河元老今凋喪
無數寒鴉遶北邙

一代文章千古身
金華殿上舊絲綸
遙知奎宿歸香案
此後光芒照孟津

落日荒城晚照低
楊花柿葉兩離迷
愁絕擬山園裏樹
錦駝飛盡子規啼

瓜洲行艤暮春天
剛遇艤艫潞國船
流血江中欠一死
至今猶憶甲申年

踈狂久與世相嗔
唯有先生愛我真
筆硯欲焚還戒酒
空山夜雨獨傷神

汝州西溫泉

草邊羅綺浴蘭湯
客路香風襲汝旁
粉黛東流無處所
泉花結乳水蜂狂
沸鼎連珠水一灣
餘波常得傍紅顏
上皇老去江山在
不爲楊家洗玉環

襄陽道中

夙醒未解即征塗
回首襄山日未晡
黃橙垂垂红柿落
一村烟火鄧家湖

隆孫園

秋日隆孫滿院香
呼觴贏得主人狂
猩紅練白偏多種
柰是黃花不見黃

猶記髮從寶慶白幾回魂向洞庭銷爭如故舊床頭酒
爛醉騎驢過小橋
的的秋花明別墅垂垂霜柿滿東隣不道繁華零落盡
此間尚有避秦人

對酒口號

癸巳四月二日

投劾歸來已四年終日乞身過酒泉當時燕子還相念
仍向東樓覓舊椽
傷心何忍問宗人化作丙丁亂後塵麥田閑看棠梨樹
依舊飛花到北隣
殘堤楊柳不勝春飛絮年年憶主人山河最是無情物
愁向乾桑問紫宸

再哭王孟津

癸巳三月

長兒新自孟津還為道尚書已卜阡桃花雨落嵩山暗
石馬長嘶古墓田

從此千年不復朝暮雲常自鎖巉峽垂楊三月難為綠
一片飛花覆野橋

馬首三川但落暉桃花梨花雨霏霏千年華表北邙月
夜半訓狐成隊飛

水哉行

鄧文明河去城十里有渠為入城路水漲輒入
城環流如帶土人恃之曰寇來且如此水何或
曰是風氣所關也為作水哉行

癸巳五月

五月八日大水來四城水道一齊開幾畝菜園飄沒盡
白龍直上釣魚臺
寒烟歷落半瘡痍地接西山羣盜窺懷州戍卒都無用
此水賢於十萬師

果然海水化桑田大地奔騰十丈泉却憶黃巾覆鄧日
河流偏竭破城年

和少室林於軒詩

憑軒聊自酌碑礫滿地松苓手自鋤小徑苔痕連雨綠
可容屐齒過吾廬

憶從嶺表卜幽居萬碧琅玕擁綠蕖今日故園亭子下
丹霞山色較何如

蓬門蘿月冷桑樞屋角屯雲堪自娛官米爭如藜藿好
古來飽死是侏儒

花間蝶夢與蜂鬚長許身為山澤癯十載將離開已遍

東臯且莫種文無

當歸名古今注
將歸贈以文無

夏園暴水長東郭雉堞參差老鸛呼并日一餐脫粟飯
有人誰解在菰蘆

小院桐君對木奴櫺欄恰好署屠廡近日長門不買賦
千金誰賫到成都

湍北庄

廢池舊堞更無隣布穀墻頭喚主人此地往年曾戰伐
鬪體夜半泣青燐

田父場中新麥飯刺麻罈內舊蘆筒翟門久已堪羅雀
怪爾排衙鬧蜜蜂

臨湍道中

噴岢山色酈陽城乍見芙蓉雨後明日暮老烏啼斷壠
冠軍元是故侯營

香巖園

看山百里踏青鞋十步泥塗九水涯可柰梧桐葉漸老
桂香風雨鎖高齋

綺䟽怪石對城隈四壁圖書共酒杯却憶商州許副使
故園幾見海棠開

萬山秋雨石粼粼燈火長千古渡津酈陽濁酒關山月

我在君家君在秦

長華齋

癸巳八月

雲根秋氣滿菰蒲水意戎戎白露孤幾日歸帆木葉下
客身常在洞庭湖

仲秋開元寺話秋陽僧

瑟瑟秋風病葉多霜池煙草亂菱荷老僧莫問前朝事
十載中原走駱駝

秋陽僧談先君讀書處

參差古瓦槐安國藍縷袈裟見爾曹芝草飄零螢火黯
一番涕淚對蓬蒿

同麻英武飲開元寺聞寇警

續言絕句上

秋煙冪歷鎖琅玕古殿風來半夜寒聞說郎西銅馬亂
寶刀如水帶星看

豆婆冢

邏城東南婆在金元間以
豆豉療瘟人德之為築冢

鼯鼯窟穴老狐窩寒雨秋風怨女蘿人間將相纍纍冢
不及荒原豆豉婆

百花洲

為范相遺蹟

夕陽白草照芊芊蕩盡百花五百年剩水殘山秋一碧
蒼鷹飛盡老狐眠

開元寺

纍纍念珠一磬幽秋瓜磊落滿墻頭低眉細說皇明事
辛苦從軍到岳州

春風閣舊址

傑閣崢嶸想像間臺隍流水自潺湲姑蘇人去千年後
魂魄猶應戀此山

送人之官雲間

紅陽草色映春袍萬里雲天一雁高不恥江東問米價
而今國計正須漕
五尺沙棠萬里篷客身二月見征鴻此去若逢孫校尉
問他年少定江東

金陵鐵甕勢崩奔浮玉峰高接海門好借便風凌建業
何須江北晤王渾

東郭離筵春盃初憑君好寄五茸書莫忘常年脫粟飯

一朝飽棄四腮魚

甲午夏張將軍予告歸維揚

聞說將軍解印歸
血腥纔自出重圍
廣陵瀑急如銀箭
好爲君侯洗鐵衣

夜行襄陽道中

馬頭蟲語頻呼夢
水底螢光乍誤星
楚竹煙深山鬼睡
忽聞古寺一聲鈴

襄陽贈趙僉事鄖陽雷潛

萬山深處著鄖城
羽檄經年鼙鼓聲
昨日將軍戰房竹
平吞賊壘正三更

穎然僧話雨中

小園二月花垂垂
斜壓三枝間兩枝
恰喜大堤僧見訪
正逢穀雨煮茶時

涼州曲送麻英武將軍之官肅州

軍鋒旗鼓出函峯
知是歌聲第幾饒
却憶隴頭腸斷處
梧桐落葉滿西郊

關西上將報新除
白帝霜寒玉露初
塞外歌兒回鶻隊
將軍笑擁讀兵書

礪鶻淬鏑帶霜熒
萬里西涼靖不庭
飲馬今看青海外
戰袍一洗向來腥

一葉金風白水秋
送君今過隴西頭
姑臧戰壘斜陽外
九月健兒青兕裘

新磨寶劍斷吹毛
况是西征秋氣高
好酌酒泉酣戰士
分甘不用更投醪
客去咸陽過便橋
離筵帶雨倍魂銷
古來偏霸涼州外
勒馬西河問隗囂
人散荒城醉曉鴉
暫邀秦女奏琵琶
此行好聽梁州曲
二八湖姬薦乳茶
豪猪韡子葡萄觴
白草黃雲塞外霜
漢使從來天廣大
甘陳姓字在西羌
崑崙山勢鬱嵯峨
城外關門帶黑河
蘇李人間多少淚
淚聲都是河梁歌
老病年來不出村
逢君爛醉幾黃昏
那看遠向陽關去

寂歷東臯又閉門

南陽送巖犖之桂林

秋草離迷博望城
斜陽驛路馬蹄輕
可憐杯酒春陵月

又向瀟湘盡處明

桂林為二水源

木葉寒臯玉露肥
送君白水淚沾衣
賜環有日來天上
相囑還從此路歸

難別高堂二白頭
孤城萬里一帆秋
河東司馬今誰是
肯把龍城易播州

巖犖內召

聞說丹書下玉墀
老臣萬里拜綸絲
遙知 聖主蒼生
意不似長沙召賈時

紫閣飛來白水春，雲霞五色擁蒲輪。求才天子臨軒問，莫謂相如是酒人。
別賦未成魂暗消，遊裝北極馬蹄遙。近來燕趙還歌舞，知醉邯鄲第幾橋。

贈雲間畫師

西窗一夜颯梧桐，雨氣芭蕉響塞鴻。忽憶鱸蓴江上客，憑君爲我畫秋風。
種瓜十載自青門，四壁烟嵐雨氣昏。便遇王維難下手，安知不是輞川村。

潦河柳翼明

迎風荳蔻帶垣斜，茅屋潦河環幾家。賸有床頭經歲酒，

秋來醉摘故侯瓜。

長干且爲駐征車，鳥語蟲聲滿舊廬。棘裏銅駝君不管，清時恥上太平書。

乙未春初訪朗然慶祥寺

陌草回春一徑幽，紅崖古水自林丘。僧房寂歷黃楊老，十載登臨感舊遊。

黃昏鐘磬鎖莓苔，何事山花尚未開。白兆峰頭人臥嬾，錫飛纔自棗陽來。

乘酣出郭便忘歸，獵騎平原野獸肥。古寺尋僧僧更少，斷橋流水帶荆扉。

浮名久自厭風塵，兔角龜毛未有因。跌坐山中還薄暮，

不知舊是浪遊人

至正寺

春寒白草宿雲多
破寺牆頭舊薜蘿
自笑半生方到此
名山何怪易蹉跎
山犬狺狺惱客過
金元遺碣上青莎
斜陽掩映經聲出
垂柳烟寒苦菜多

同友遊南寺

五斗宿醒猶未開
攜尊又覓酒人來
桃花紅雨歆成陣
柳眼青青古寺隈

聞家耿言

何事睂鋒鎖未開
家書新自廣陵來
館娃已作楊州土

斜雨酸風上楚臺

于園亭子碧琅玕
知是當年大將臺
莫向鐘山淮水望
幾回悞却舊長安

禹山

夏王宮殿石門開
金碧曾經付劫灰
桃瓣繽紛花自落
頽墻白日老狐來

石城砒磳著山顛
蜥蜴奔馳破廟前
無數髑髏荆棘裏
夜來鬼火下平川

但有飛花伴夜燐
簷前蝙蝠舊車輪
欹斜石城蒼苔滑
不見清明羅綺人

秦兵十萬擁湖沙
一夜西風散暮鴉
近日僧魂無處所

春花堆裏憶袈裟

嵩山僧

曾聞中嶽雲深處
天外雄風掛野猿
我欲騎龍絕頂上
崑崙西去見河源

三鴉路斷入弘農
藍縷袈裟第幾峰
萬壑松門石徑小
六時白業對芙蓉

沈家橋

新雨泥沙半沒橋
觀門榆樹築烏巢
老雛莫下麥田去
黃口雛兒怕阜鵞

西庄大水

桑田一望水瀾瀾
來穗泥中首半垂
黑墳猶自藏魚鼈

寡婦腰鑣待舉炊

小堰常年鍤似雲
半勞閭左半勞軍
天吳解惜蒼生力
一夜全漂馬武墳

高原甌脫麥難秋
茅屋人家曲水頭
昨日中男河上至
長堤又報決曹州

投劾山庄已十年
濁醪醉枕漢書眠
不勞車馬來相訪
門外鷗鷺范蠡船

訪梁見賓不遇

戍卒雕弓箭滿腰
荒園風雨漫蕭蕭
孝廉只在郭門外
綠柳人家第幾橋

馬雲孫靜嘯齋

康莊先生讀書處

綺疏小築簡遺簪坐擁專城書萬函無限石渠金馬淚
龍門太史舊周南

山園雜樹振流鶯萬綠葱葱雨乍晴石丈昂藏灰劫外
十年困扎大梁兵

晤白二明憶乃兄

新野城南舊酒杯廿年佳勝已成灰蕭蕭車馬垂楊路
怕有山陽隣笛來

入洛機雲髻正垂舊遊零落感交期騎驢再過乾明寺
想見談經夜坐時

芍藥花間荷葉厄不堪覩縷憶當時向來跋扈飛揚意
半付光皇白水祠

義陽百里水潺湲禁旅長沙人未還聞說牂牁初置郡
象兵久已掃嚴關

寄徐漢輦

車馬故人海內稀廿年殘夢岵山暉白亭風物還相憶
篝火長楸二十圍

岵嶭峰高鐵鳳鳴武關西去月三更舊遊知有黃壚在
白首傷心老驥行

再經南塘

潦潭碧曲埜魚肥蟬噪垂楊嬾不飛犀角銷沉羅襪散
衡陽南去鴈書稀

飲少室同見賓作

廿載離愁滿驛筒不堪老去各成翁
一生半在兵戎裏今日長沙未掛弓
山月經秋帶晚霞幽篁石壁海棠花
留君且莫出城去南客新將白嶽茶

讀史亭詩集卷十五

終

讀史亭詩集卷十六

南陽彭而述禹峰甫

七言絕句

下

經泌陽

以下常寧刻集

顏垣古廟草萋萋泌水從來流向西
雨後羣山綠似髻蟬聲又向夕陽啼

泌東老楸

泌陽老樹自離奇龍虎身存未死枝
夜來風雨雷霆鬪可似昆陽大戰時

臨安已事總堪悲花石君臣寢廟危
此物中原留正統六龍猶未渡江時

碑云紹聖二年建寺

申陽憶雲和尚

桐栢山頭憶老僧紅崖脚下注三乘從君去後山門寂
蘭若新生十丈藤

蕭王店

薦草荒岡沒馬蹄玉簪花下老僧棲逢人莫話蕭王事
白水烟寒怪鳥啼
曾聞火德厭東都此地猶存赤帝符河北當時無鄧禹
雲臺強半老庸奴

經上蔡

城郭蕭疎著廢菴離迷亂塚老樵探李家黃犬歸何處
狡兔縱橫遍汝南

秋深亭午日炎炎槐影婆娑掛酒帘少婦黃頭門半掩
南家借取北家鹽

望銅雀臺

漢業關東走戰場阿瞞鄴下起咸陽當塗未幾還司馬
千古悲風吼白楊

寢臺依舊傍山阿香粉從教化薜蘿地下荊州思往事
一枝烏鵲較如何

酸棗南來白馬津高臺插漢自嶙峋女郎不共曹公死
只爲生前善負人
建安殘瓦錮三泉磨洗爭傳作硯磚不信曹家文字鬼
猶分墨瀋到千年

邯鄲懷古

趙城實自胎秦政秦政還爲吞趙人若使武靈長不死
未容奇貨帝西京

靈王胡服古今奇此義無容豎子知試看山河北晉後
中原半是曠騎兒

十萬秦兵走趙時虎狼竟不敵烏騅至今草樹猶酣戰
白日風沙捲大旗

邯鄲使者意張皇誰識真人酒肆旁始信天心留火德
肯教卜者帝咸陽

趙家宮殿鎖莓苔歌舞千年去不回夜半箜篌彈鬼女
君王猶自讎叢臺

鄆城

火德未灰誰更燃南陽突起春陵烟二祖東西無定法
鄆南爭似入關年

滿城飲袁開鴻

時予有湖南之遊
袁以西寧道里居

威名十載隴頭雲膽破西涼回鶻羣試看城外蕭關月
至今猶憶冀州軍

過方順橋哭夏恭來

上元燈火一尊初廿載交情桑海餘路入山陽腸欲斷
幾間破屋照殘書
寒塘禿柳鎖嗁烏老友重泉不可呼十畝荒園還牧馬
健兒帶酒跨雕弧

強半同遊付劫灰白頭獨自過燕臺山河無恙人空老
正月梅花凍不開同遊李孝源張箕疇
王九玉今惟予在
凌雲壯志困諸生四海交遊愧爾情保定西來尋旅店
往年別墅是軍營

尹村再看王孟津畫石

相公潑墨抹雲根元氣氤氳骨存爭似平泉一片玉
贊皇貽累到兒孫

斜日荒岡雪半封投鞭下馬拜芙蓉燕山不少南遊客
錯認杭州郭外峰

先生筆墨妙如神南渡鈞衡說孟津六代金陵流水去
貌山爭似貌麒麟

後有盟津前太倉國朝盛事屬諸王可憐建業紀元日
依舊花網說汴梁

長安古道重經此壁上烟雲二十年生死交情星物散
白頭立馬獨潸然

奉使剛從秦蜀歸中台星已失光輝精靈五岳應難散
時向孤村壁上飛

長沙送傅同野歸孝昌

十年繫馬大洪山憔悴支離鬢已斑流落荊州空下淚
一江白露送君還

尹村真原寺遇慶雲僧

西山晴雪捲啼鴉寥寂寒烟四五家紫陌琅璫浙瀝夜

露林落月滿袈裟

丙申春過內丘南圓津菴

晤印亭和尚讀
覺斯先生遺墨

登臺彌望旅魂清積雪平原一磬鳴
嵩洛文章印上月
墨花常照內丘城
廿年底事感前遊
車馬勞勞竟白頭
再過招提誰更識
青松自護藏經樓

黃梁祠

往來車馬織如梭
萬古繁華枕上過
何事盧生偏授枕
世人無枕夢還多
仙祠碧瓦對叢臺
楊柳烟深春又來
月落南城歌舞罷
仙人枕上夢初回

送徐漢輦之白亭時予亦遊楚

芒鞋路出岵山東
二月桃花斷續紅
倉猝更憐新雨散
瀟湘南去見征鴻
石塢殘梅落舊枝
故人歸騎曉風吹
家山岸峒雲深處
夢裏丹崖喚子規

家園晤董心水

夜半軍書下武昌
琵琶洲上陣雲黃
興亡南北真殘夢
往日江山剩酒狂
三山黃葉萬羅秋
十載江東感舊遊
白水相逢春又盡
殘花暮雨過南州

瑩潔園

丙申四月

小園曲檻一泓幽紅藥翻階綠竹稠
暮煙寒楊柳路鶯聲恰在水西頭

飛盡楊花燕麥翻十年舊夢落平原
殘軒老蕙深相待離亂傷心不可言

蜀僧大澤九十相逢沙陽隄上
九尺身軀九十人腮毛尺許更無倫
憑君欲問青城路擬向玉皇稱外臣

成都西去逼流沙積雪寒生六月花
問爾何年離故國週餘甲子更無家

佛是西偏爾却東山河大地一宗風
瞿塘雨色夔門月只在孤筇想像中

過約價口弔譚擬陶

鳳凰山上酒盈卮藍縷相逢草昧時
藝苑飄零詞賦盡江山寂寞柳垂絲

雨中興國寺酌劉大祈

觚稜古瓦帶青籬鸚鵡聲喧烏柏枝
怪是愁心江雨暮郎官湖上酒盈卮

殘碑風雨照精廬苔蘚何來蝕篆書
聞道年豐香稻賤一時價重武昌魚

鱗州即事

長江彌日雨沈沈一曲人家楊柳深
隔岸孫曹餘戰鬼千年青火照烏林

衡藩邸酌將軍

夜半新粧出畫樓琵琶按部譜涼州衡陽怕有南來鴈
錯認笙歌醉故侯

天上歌喉掌上身梨園占斷幾回春大娘未死秦青在
閱盡繁華是此人

栢坊

清湘兩岸綠如鋪碧水中分好畫圖頗柰扁舟忙裏去
春山欲盡鷓鴣呼

問飛來船

有引

飛來船在衡嶽南天門外予庚寅登嶽為偈付
僧疑其飛去數日大風雨忽不知所在湖湘間

傳為異事丙申復過衡邑問麓下居人船果烏
有矣為此詩以訊山靈

空山雷雨奮孤舟化作神龍不可留天上銀潢不用棹
如何搜取到山頭

繫馬湖湘已六年遊踪半在祝融巔重來無復懶殘在
不獨南天門外船

偶因霹靂錦帆開誰謂凌雲去不回我欲征南通五嶺
樓船好逐伏波來

我詩未必速君去君去似當因我詩寄語南陽韓吏部
雲開自此不為奇

寄破門

秋風江上暮雲屯書寄衡山老破門遶樹名花思舊客
多應憔悴海棠魂

過衡麓清涼寺憶寂虛和尚

子丁亥及唐寅兩遊此中
今丙申秋又至僧化矣

君遷樹老鷓鴣啼墨食蛛絲感舊題鹿苑飄零香積冷
祝融峰下白雲低

訊破門

有引

破門住石船下予前衡山記有云船有時飛去
如老僧頭顱何船于是年飛去破門無恙書此

訊之

船去不應爾獨留屠蘇剩得老僧頭金剛未碎慈航杳
莫上祝融觀海樓

李皓白來衡山隨筆二絕

戊戌初夏

食盡蹲鴟兩鬢蒼祝融紫蓋霧茫茫繩床丹竈白雲裏
不把長生授始皇

采藥衡山兼負薪朱陵暫作武陵春靈武功成君莫羨
長源終是假仙人

雁峰訪破門

筍輿詰曲入芊眠怪有招提著樹巔萬箇簷簾新雨綠
白雲一縷是茶烟
僧樓斗絕倚山根檻外芙蓉帶雨痕自笑山公無政事
一行出郭便黃昏

雁峰下晤秀栢僧

白雲輪囷鎖禪扉短竹蒼藤水一圍怪是啣泥雙燕子
聽經帶雨傍人飛

戊戌正月遊清涼寺

有引

衡山北郭精舍一區林篁蔚然佛鉢因依予自
丁亥及庚寅兩遊其地與靜者寂虛友善別來
忽忽又七八年歲在戊戌予復以朱陵使者來
則寂虛泥洹久矣相傳其白緜藏處距茲凡一
由旬蓊莽荒穢不可去乃爲詩四絕以付弟子
寄慨焉遊僧蠕蠕卒未有識予者噫安得不重
念寂虛哉

曩年車馬滯山門坐對毘黎看雨痕一去流沙終不返

林間青雀幾黃昏

唱和詩

祝融脇下譜精廬夾澗溪聲濺佛書此去定生山鳥怪
近來解向市城居

衡山高處與天齊曾向峰頭聽曉雞近日山中茶稅苦
祝君莫向此中棲
怪是青鞋不入城雲囊又懼往來兵莫把烟嵐驕府主
年來官長服黃精

雲母平分下紫駝青山割據老僧多湘川爭似江東水
霸業烟寒付楚歌

蘇山絕頂

黃葉蕭蕭萬壑翻
楚山歷盡此山尊
遙看五嶺東南盡
欲把羅浮作子孫
一抹芙蓉仙佛鄉
祝融回首見蒼茫
靈山慣作長生宅
不比中原作戰場

臨武北馬戾山

漢將征南過楚分
山頭駐節至今聞
勲名不列雲臺上
何事蠻荒獨憶君
伏波威畧重南方
兩度軍書下洛陽
不謂交州多薏苡
空山俎豆爲誰芳

赤石司

十里山岡九十盤
還從木末俯驚湍
離離紅葉河邊女

亂踏雞欄看宰官

常寧北留別吳正持

以下攸縣刻集

黃茅嶺上醉征塵
咫尺關河萬里身
疋馬昆明君莫笑
白頭偏欲畫麒麟
金馬碧雞六詔城
通侯自此屬書生
還看勒柱流沙外
萬古西南不用兵

戊戌冬予以觀兵一至白蓮山閱明年己亥又復
至柳適喻子孝廉來訂重遊已許之矣驅車西歸
匆匆未果書此寄謝白蓮

蓮花頂上孝廉居
雞犬雲中識舊廬
莫羨旌陽拔宅事
金銀宮闕更何如

道左題書謝白蓮仙源有路夢相牽再來欲向青城老
莫學衡山頂上船衡岳頂飛來船爲余題詩飛去事在辛卯
西風嫋嫋捲朱旗恥向蓮花訂後期世上交情無久暫
青山半面是相知

讀朱五溪來書憶及舊事

亂離把臂共酸辛萬死餘生賴此人許大滄桑轉瞬過
新亭舊淚滿江濱

底事傷心問甲申元黃戰血膩征塵江東王氣天心去
惹得兒童說孟津

祁陽寄李將軍

離亂交情十五年零陵歌舞散如烟重來欲覓曾遊處

雁斷浯溪黃葉天

真看蟣蝨長兜鍪子在芝山我靖州差爾圍城一百日
苦將雀鼠易封侯

長沙晤楊岫青廣文

庚子 以下滇黔集

青宵羯鼓醉燈花况是城頭隱暮笳我欲憑君尋屈賈
才人流落是長沙

沅州四首

沅州楊柳帶虹橋日暮山深喚百勞客去滇南一萬里
雄風得似霍嫋姚
枇杷樹裏鷓鴣鳴江上離觴送客行聞說蘭滄堪飲馬
瀘江爲問武侯營

舊遊曾記在江鄉鐵甲鏖兵幾戰場今日滇黔歸正朔
犛牛寶布溢蠻方
沅州有路下牂牁再見將軍馬伏波畧地還須交趾外
狼臙裸國入饒歌

靖州贈高將軍時君將卜居襄陽

將軍唾手靖黎平鐵甲霜寒萬馬橫贏得黃金如斗大
歸來共醉漢陽城
戰伐雄名二十年草木兵聲下楚天猶記湘東橋上事
萬人敵裡着先鞭

饒歌

有

皇清得天下十四年先是以滇黔險遠王師未收今大

兵三路進以順治戊戌春進兵四月十八日抵

黔次年己亥正月三日復滇詩作於長沙舟中

乾坤混一屬 皇清忽報滇南一鼓平此日應開平樂
監屯田早過貳師城

兵威遠過大荒西談笑山河盡碧雞從此燒當傳校尉
任教畜牧到渠犁

哀牢山下血花斑姑墨莎車只等閒都尉還開西海郡
君王莫閉玉門關

天南鼙鼓戰雲昏裸國文狼各斷魂卻笑燉煌持節者
至今猶未識崑崙

黔中地接楚山橫歲苦苗租供老兵練甲戈船邊報急

塞笳飛入義王城
神槍象背走梨花
血戰屠耆日已斜
莫話衡陽橋上事
大軍今已逼流沙
壯士昆明慘不驕
益州王氣黯然銷
公孫自棄夔門險
悞國無如鐵鎖橋
臥榻曾聞睡正憨
王師半壁下西南
宗周已盡羆狐聚
可許姬嘉祀子男
五華山下鬼啾啾
西下蘭滄天盡頭
史冊莫書南宋事
崕山亦是舊神州
金沙一望氣模糊
平緬麓川今有無
八駿還看穆滿去
曾無寶玉鬪河圖

貴州送張龍涵之官宛城

客中送客倍思鄉
莫惜金尊倒夜郎
君去試看白水上
東都將相半南陽

君去中州我入滇
鄉關萬里夢相牽
因君好寄平安字
家在青山白水邊

太白南陽詩青山環
北郭白水遶東城

平壩西天台山

道傍山脇出危峯
馬首寒雲一望中
何必阮劉能到此
層霄開遍萬芙蓉
黔中也自有天台
石磴峻嶒平壩隈
雞犬真從雲裏下
飛梁絕壁老僧來

筇竹寺庚子長至同左轄李嵩岑驛鹽史質輔屯

田蓋封之諸君遊出昆明城北可十里寺在山腰
俯瞰雲城雉堞歷落伸手可捫二子始起始蹇隨
侍

十圍梅蕊從中吐三丈牡丹何處來遶屋流泉奔響寂
松陰更傷石門開
無端香積帶屢屢憔悴寒山自一時斜日風鈴傳寺角
群花競發向來枝
千盤石徑晚松低萬卷靈文霄漢齊鐵馬銅駝思往事
山僧莫話永昌西
六詔凋殘舊戰場青山無恙一松長王孫老去仁祠在
頗耐興亡是夕陽

滇曲四首

絕塞桃花沫若春經年司馬倦遊人漢家新置犍為郡
不許沈犁稱外臣

髦牛笮馬古西偏翹婢今耕塞下田莫向中原比廣大
鑿開混沌是張騫

曾聞身毒帶西滇蒟醬筇枝大夏前益斥零關八校尉
當羗今是入朝年

桐師東下絡斯榆略定西南剖帝符建節中郎王副使
威名得似潁川無

別滇友之粵

辛丑
二月

分手昆明倍黯然鐵橋南去柳如煙金沙戰鼓雪山夜

莫問君王少府錢
花馬城東柳色寒
一官萬里幾回看
轉憐舊地時躡在
更覺良朋遠別難
鯨海龍荒指顧收
鳴鞭今過海西頭
嶺南風物齊州外
夜半星辰地上浮
銅瀨風高黑水寒
離筵載酒莫辭歡
珍州南下蒼梧遠
山色爭如不共看

別璞函

良朋送我過東城
水上桃花陌上鶯
歸化寺前青麥浪
不堪重聽鷓鴣聲

楊林別友

春風無賴夕陽斜
開遍棠梨幾樹花
也有勞勞車馬客
停鞭一啜大華茶
憑虛薄暮萬山低
芳草垂楊綠正齊
異日并州回首處
故鄉多在曲陽西
無端社燕弄春暉
倒捲楊花入翠微
更是松濤千壑沸
却教別淚溼征衣

鼎湖詩

鳳曆編年十八秋
山河指顧誓金甌
可憐鼎就龍昇去
戰馬猶餘黑海頭
元菟朱崖暨朔方
樓船鎧仗兩相望
茂陵衰草秋風夜
猶聽嵩呼少室旁

過鐵橋二絕
鐵橋黑水舊知名天險曾當百萬兵試問臨邛持節客
當時何路入昆明
萬山壁削哈呀裏怒石橫江雪浪時蒙段山河流去
此情惟有鐵橋知

沅州贈徐兆興

河北將軍握虎符偶然借箸到南都壺頭山上五溪月
舊照征蠻跨馬圖

破門忽來自衡山共醉伏波山下走筆三絕

十年兩上越臺百粵山川更酒杯莫謂衡陽真斷雁
秋風先送破門來

石船飛去在何方船下山僧舊草堂今日蒼梧還對酒
可憐頭白漸如霜

別來衡嶽已三秋飄渺真同夢裏遊獨秀山間今遇汝
始知衡嶽是并州

粵閩司廳事古松同胡德輝黃抑公為張一巷賦
長松鬣鬣捲秋雲領袖蒼梧獨有君卻笑秦人封不到
可知大樹屬將軍

西粵送劉心一移師鎮遠

秋山黃葉動旌旗浴鐵霜寒草木知近日夜郎成漢縣
此行重勒武侯碑

灕水南來接五溪山連銅鼓草萋萋提師早過金沙外

可許論功大夏西

辛丑閏七月小飲獨秀山下同胡德輝黃抑公兩
司長即席爲書荆山便面

雄名自昔跨涼州况值侯封更虎頭壯畧還看開九郡
即今內地是炎洲

西粵送揚將軍崑伯之番禺

離戈此日靖波臣九尺梨花百戰身鱷浪即今看盡息
本朝王會過朱垠

楊僕初聞下瀨纜飛鳶跼跼墮蠻江貢來南越鴻臚館
生翠還看四十雙

獨秀山

便將拳石峙孤峯百粵山川爾獨雄歌舞臺空羅綺散
年年秋葉下梧桐

參天百丈削芙蓉不合王孫貯後宮朱邸繁華銷歇盡
丹崖翠壁野棠紅

秋日聞李鑑湖言漢口藥僧最愛予書走筆二詩
爲寄

廿年遊楚愧霜蓬悔未廬山識遠公何日淵明還載酒
蓮花一醉漢陽東

生平酷愛只名僧五嶽峰頭幾度登一葉同看六代月
雨花飛處是金陵

寄全完吾柳州

遼陽鐵馬舊知名百戰功高嶺外平
聞道安南新入貢可知飛將在龍城
三韓組練佐龍興唾手崑崙一鼓平
此日山河還白馬璽書早下越王城

送盧用章歸里

蕭蕭黃葉送行舟歷落一生今白頭
李蔡爲人中下在古來善戰不封侯

七星巖

巖在桂林城東傍灘江岸連綴七峯
孔穴稱最初入如大厦數間秉燭而進
長可十里或如宮殿人馬或如刀劍戶牖
奇怪詭譎種種不可思

議之物罔不具造物者誠勞矣聊賦三絕

灘江石尚自逶迤雲母胎銅幻作姿
聞道阿房宮闕盛只如秦火未焚時

河圖海貝滿屋屨變化靈巖匪所思
竊喜名山還愛惜深藏不令市兒窺

神工鬼斧鬪呆愚羅列琮璜大貝時
禹貢九州方物外獨畱寶氣照南陲

尚紫雲有燈上麗人作和二絕

羅幃金屈乍生香姊妹花間第一行
莫向伏波山下走恐人悞指舊椒房

酒闌花謝露爲霜傷豔何緣舞袖傍
似有歌聲來座外

就中若箇是周郎

壽謝將軍

江東子弟舊烏衣
白鼻雕鞍橫槊飛
萬里邊陲無戰伐
霜天紅葉獵禽歸

殺賊誰能更賦詩
侯門將種羽林兒
幽并部曲嶺南道
手撰饒歌馬上吹

豪猪鞞子豹花裘
十丈蓮花照粵州
鞭底珊瑚金勒馬
况逢高帝好封侯

爛熳兵書五十家
偶隨長劍到天涯
清霜一掃黃家崗
都護新乘獅豸花

偶讀昌黎桃柳詩忽有作

壬寅古田

故園空負幾年春
二八紅顏翠黛頻
一去昆明三萬里
無情最是宦遊人

綠楊飛絮別江邊
淚染胭脂溼畫船
玉塞金沙人更老
溪閨無復問流年

聚櫟嚴城記古田
無端若有夢相牽
叮嚀耳語知何用
嶺外題書雁不傳

飛花拾翠憶南園
醉裏笙歌欲斷魂
老去邯鄲還入夢
獨憐春色怨黃昏

昌黎桃李豈無因
獨有娉婷憶遠人
世上蛾眉真薄命
幾人能占大官身

別後郎當不可支
玉蟲金粟兩迷離
春華歲歲催人老

馬上征人知未知
明珠灑淚說干戈
老大逢君離亂多
料得封侯還有日
妾年不待意如何
每向妝臺憶老奴
十年九過洞庭湖
生平要上麒麟閣
陡覺歸來雪滿顱

永寧口號

山城正月自飛花
桃李紛紛若個家
羯鼓元宵人不臥
銀環粉面鬪琵琶

搗箏搥鼓笑顏開
跋扈飛揚獅子來
木客魂搖山鬼避
平身踴上越臺

紅顏二八采山茶
半是山腰半水涯
昨日巫臺雲雨夢

鬢間粉蝶任橫斜

廣州木履着新成
我欲尋郎無姓名
結隊連肩榕樹下
當歌細聽僮兒聲

聞黔中觀察信予以順治戊子填撫此中閱康熙
癸卯十六年矣

十五年前此舊遊
高牙大纛照黔州
驛亭如故劉郎老
惹得山花笑白頭

汛掃欃槍十萬兵
勳名自我隨垂成
滄江一臥年華去
猶向三苗嶺上行

蒼梧別友

以下續
滇黔集

猿臂雕弓左右彎
軍中白馬賀蘭山
雄風唾手安南國

辦取通侯髻未斑
興朝將相果無倫
鐵甲霜寒九尺身
血戰歸來還露布
佇看投袂上麒麟

送趙振判鎮安

新野人

何來藤峽碾車輪
象郡荒寒塞樹昏
暮雨鷓鴣啼不住
看君匹馬奪崑崙

昭平南尚書祠

灘江東下尚書坊
碧瓦朱楹辟荔墻
香火依然無姓氏
老烏日日送風檣
丹雘蕭條古澗垂
夕陽老樹護殘碑
估帆上下畱蘋藻
堂上衣冠竟是誰

新寧左家庄

萬山綠學氣蕭森
石徑荒涼竹嶼深
土銜柴門黃犢健
癡兒猶自狎山禽
君遷樹下好池塘
種得嘉魚半尺長
舉網還須車馬客
經年七箸不曾嘗

會同贈何令調之題公署壁

今諱林山陰人

郵亭古樹積桐柯
介馬曾經夜半過
往日長干人不識
老兵略記會同河

匆匆此地又逢君
三載離愁五嶺雲
猶恨不登岷屋寺
鐘前黃葉下紛紛
陣雲夜捲五溪時
獨擁旌旄十萬師
勒石磨崖成底事

多君刻我戰場詩

貴州送滇令聶聯甲歸蜀

握手昆明已四年逢君此日下西川
花開蜀道鶯啼早莫信連山只杜鵑
益州霸業古來偏猶記成都割據年
劍閣崢嶸連白骨庸才豈獨是劉禪

送江川王令和曲林守歸江東

十載遊裝西海頭金沙鐵馬碧鷄秋
檳榔爭似江東米一葉孤飄白露洲
與君把臂醉昆明此日巫黔百草生
萬里良書江右去祝君莫過石頭城

三年別汝倍含情黑水蘭滄鐵馬聲
邂逅牂牁還雨散一帆春水建康城

春風弱柳五溪舟一線中通萬里流
此日東南無戰伐滿船簫鼓下揚州

小箐

王師征水西時予由黔臬奉移滇藩之軍中道上即事之作

六月單車小箐中萬山綠學鬪殘紅
不知何處清商發十部笙歌別院東

十丈黃泥帶板橋半沒馬脊半人腰
水西六月勤飛輓菽麥餽糧滿袋挑
崗中羅列見樓臺丹雘依然石壁開
百丈懸藤牽不上官兵何自解飛來

健兒力疾負官糧百里山程粟一囊自古輿圖連腹裏
敢云羅甸是遐荒

西南詞贈袁天罡

髦牛江外若水渾倒捲牙旗拜至尊越舊何年連舊郡
草間山月醉黃昏

朱提縣外瀘江西十萬雄師駐馬蹄算來不及蜻蛉戰
一時鼓角到雕題

博南山下渡蘭滄琥珀珊瑚兩相望當年解甲十餘萬
不遣鈎蛇在道旁

秋日重過水南寺

荏苒韶光又五年夢中曾記舊遊滇白首老僧猶念我

門前流水尚依然

石橋流水帶斜陽贏得山僧午夢長猶記往年曾到此
紫薇花下醉迴廊

五嶽祠

溯洄亭午出孤村映帶湖山即寺門中有青松間雜樹
滿堂鐘磬易黃昏

方塘楊柳帶城隈老革籠東騎馬來何處西隣偏醉酒
酣臥繩牀門未開

七月廿六日送大軍之蒙自

馳驅戰馬雨霏微壯士南征載鐵衣饒有秋風歸去好
征鞭急着早鴻飛

廿八日別昆明作

雲南附郭承恩寺兩度同官送我行杯酒闌珊人更老
何人躍馬復西征
白頭流涕板橋霜知己難逢淚幾行我去家山歸夢穩
莫教羽檄到南陽
暮年知己易蹉跎殘病相尋且放歌西節魯山堪自臥
未容車馬一相過

別公珍

誰向長沙問布衣當年唯爾坐漁磯昨日相逢鐵佛寺
一村燈火出熹微

附
三言古

湘南寺

南天門下一里 江寧刻集

南望湘重徘徊山壘壘失崔嵬瞰湘流只一杯艤岸久
不肯開蒼梧雲白皚皚松風響萬壑雷

彼岸亭

在中山南樹王下

日出遲客行早露華滋白石皓蒼龍盤赤蛇矯太古雲
無昏曉

茅坪道中

自中山西首為桂府道場

火傘張深山暑下懸崖萬丈許石雞鳴鬪山塢毛鬚鬚
或飛鼠西窗外柚樹巨紅果垂如赤琥鮮可摘薦佛祖
楚王孫在何所

丹霞寺

丹霞寺望衡州湘九折灣如鈎風浙浙鬼啾啾海棠發
滿山陬倚竹笑帶雨愁恨不見李鄴侯

廣陵道

廣陵道紛羅綺紈袴兒黃金子百壺珠換小婢白雪飛
燕子起艷華鐙剪蘭蕊主人醉葡萄美臨春臺但殘壘
風流墜妖姬死秋露肥凌葵藹江都夢竟誰是

六言絕句

紫金山 家集

堦下犍牛眠草門前石虎撲人班鳩晴猶喚雨白骨夜
來滅燐

麥風吹散桃花酒氣鬱成戰壘天旣無勞生瑜士亦何
須始隗

王猛終成一隅諸葛枉就三分英雄多留未了笑他聚
訟紛紛

秦關自古多塵塞上何日無馬典午豈料平陽宋禍不
由西夏

蝴蝶憑風上下蝦蟆入座喧譁道人編鬚尺許客來手
供南茶

經年讀書忘倦連日不飲成疾舊遊忽憶南岳夜半祝
融看日

漢禍全貽黨錮宋亾已釀熙寧山河雖然易主老成不

在朝廷

林甫就終牖下蔡京自死潭州天網原多疎漏曾聞作
惡日休

觀音寺

榮木臨風欲語黃鸝帶露初來糟氣似聞香積鉢魚莫
是尊壘

屋角種桃如繭道傍牧豕不羴剩水白魚狼藉屣提可
飽一齋

池邊柿樹成蓋籬外牛蹄過橋一枕佛堂初覺斜陽已
到殿腰

伐鼓爭驅魍鬼徵兵欲下南蠻何處六月無暑前年我

在衡山

詩餘

憶江南

即事二首

江寧刻集

廉纖雨一夜杏花殘遊子山中騷裊溼長河曲裏杜鵑
寒遮莫獨凭闌

曉起處雀噪小汀隈怪底林花猶踏雪如何園笋未抽
雷人自濁河來

行香子

懷孟津

嵩岫嶺岈洛水潺湲跨驂騑塵滿朱顏麥風搖浪梅雨
拖烟歎雲霏微花歷亂鳥綿蠻塵土摧殘旅鬢闌珊
盜如毛馬策刀鋸與君共轡歷盡間關痛螢火飛暮草

宿劍光寒

江城子

春懷

百花洲上柳絲柔望南洲淚長流霧髻烟鬟長鎖夢中
愁大別山頭杜宇血老去也對筇篻近來頗覺雪凝
頭酒添籌戲藏鈎簾外鶯聲曉語朋儔無那春風都
是恨芳草岸岳陽樓

金人捧露盤

憶舊遊

看花來憂花去愛花紅正西山烟雨濛濛承天門外繡
袍錦帶馬如龍當壚買醉小亭北細唾雕籠棘藜叢
銅駝陌金仙淚露盤中烏衣巷無復江東五侯七貴西
風一葉響梧桐海青嘹唳笳聲起淚灑英雄

千秋歲引

懷舊

楚國江干粵南地角畧記當時傾乳酪朱門漏沉絃管
送白苧風翻琥珀落智高臺佗尉壘交相錯無柰嚴
飈吹絮薄無柰夢魂繞池閣一葉北來吊黃雀問騷人
枚叟去梁負奇氣賈誼生洛白頭催青衫溼悲歌作

驀山溪

自敘

汾陽橋上春綠流鶯語傀儡笑當場跨欵段曾無寧宇
鐵騎如簇突入舊漁陽銅馬黯御河渾慘淡梨花雨
南遊避地一旦同飛絮攜手老尚書亂軍中雕弧滿路
鶯花謝了歌板舊金陵朱雀桁景陽樓衰草斜陽暮

滿江紅

飲夏人淑憶
江漢諸子

江漢先生建雙戟南床呼白畧記得絳帷羅列傳經多
客作賦曾登王粲樓反騷一吊靈均宅魯諸生送我過
襄陽淚前席 到今日十年隔空悵望楚天碧歎半生
潦倒九霄摧翮猿臂將軍舊姓李雀羅門巷今稱翟再
何時飛過洞庭湖吞夢澤

滿庭芳

春酒獨酌

春雨廉纖東風尖側樹頭烏訴黃昏一杯孤酌往事動
心魂憶昔長沙寶慶銅鑣響賊壓崑崙那堪更徭人苗
女蹂躪五谿渾 幕中出勝算雕弧羽箭斬馘紛紛歸
來和湏乳飲至策勲而今十年去也頭白了曩日軍門
權撤下雕蟲老蠹斗酒對孤村

水調歌頭

清明

二月行將盡節序逼清明昨朝騎馬西舍春酒醉宜城
芳草爭青南陌燕子初來華屋此處幸無兵短鬢禁滿
洒老去淚縱橫 平陽墳汾水驛鐵戈聲歸來千里旅
櫬有子愧成名屈指近當寒食插遍新墳楊柳杜宇血
三更翹首禹山道腸斷若為情

又

憶兄

文杏飛殘雪楊柳織初鶯當時峴首南去作客夫人城
歌聽銅鞮冶女醉看接離太守連袂走難兄羣盜紛如
蝟江漢嚙長鯨 我羈旅君歸去各飄零一朝君去泉
下有弟獨吞聲十七年來一夢每遇東郊寒食風雨不

勝情伯道復無後天意不分明

讀史亭詩集卷十六終



